



Wie Sifrit
nah den Nibelungen sinen rechen svor.

VIII. Auentiure.

Sifrit der vil chone, dannen gie zehant,
insiner tarnkappen, da er das schiffil vant,
dar an so stont vil tougen, das Sigemundes chint,
er fortez also balde, sam ob es wäte der wint.

Der vergen sach doch niemen. wie fere; schiffel vloz.
von Sifrides chresten. di warn also groz.
man wande daz iz forte. ein sonder starker wint.
nein ez forte Sivrit. der schonen Sigelinde kint.

Bi des tages cite. vnt in der einen naht.
chom er zeinem lande. mit grözlicher maht.
daz hiez zen Nybelunge. vnt wären sine man.
lant vnt burge. daz was im alle; vndertan.


Der herre for aleine. vf einen wert vil breit.
daz schiff gebant vil balde. der ritter vil gemeit.
do gie er zeinem berge. da ein borch stvont.
er sohete herberge. so noch die reisweden tvont.

Do chome er for die porten. verslozen im die stont.
ia huten si ir eren. so noch die loten tvont.
anz tor begonde bozen. der vnhunde man.
daz was vil wol behvetet. do vant er inrethalben dran.

Einen ungefügen. der der porten pflach.
bi dem sin gewäffen. zallen citen lach.
der sprach wer ist der bozet. vzen an daz tor.
do wandelt sine stimme. der chyne Sivrit da vor.

Er sprach ich bin ein reche. entsliezet vf die twer.
mir mo; eteflicher volgen. noch hütte der fwer.
der gerne sanfte läge. vnde hete sinen gemach.
do zvrnder portenäre. do daz Sifrit gesprach.

No het der rise chüne. sin wäfen an sich genomen.
sin helm vf sin hovbet. was im vil schiere chomen.
den schilt er balde zuchte. daz tor er vf do swanch.
wie rehte gremliche. er gegen Sivride sprach.



Wie er getorste wechen. so manigen chvenen man.
da wrde flege swinde. von finer hant getan.
do begunde im schirmen. der herliche gast.
do schoof der portenäre. daz sin schilt gespenge brast.

Von einer isen stangen. des gie dem helde not.
ein teil begunde forhten. Siurit den tot.
do der portenäre. so tobelichen slooch.
dar umbe was im wäge. sin herre Sifrit genvoch.

Si striten also fere. daz al div borch erdos.
wande ir beider sterche. was vnmazen gros.
er twanc den portenäre. daz er in sit gebant.
do erschullen disiv märe. vber al der Nibelunge lant.

Do hort daz grimme striten. verre durch den berch.
Albrich der vil starche. ein chvone getwerch.
er wart gewaffent balde. do lief er da er vant.
disen gast vil edelen. der was in beiden vil vnbechant.

Albrich was vil grimme. darvo starch genvoch.
helm vnt ringe. er an dem libe trooch.
vnt eine geisel swere. von golde an finer hant.
do lief er harte fere. da er Siuriden vant.

Siben knopfe sware. die hiengen vor dar an.
da mit er von den hende. den schilt dem kunegen man.
slooch so bitterlichen. daz im des vil zebraft.
des chom ingroze forge. do der wätlich gast.

Den scherm er von der hende. gar zebrochen swanch.
do warfer von im balde. sin wafen daz was lanch.
den sinen kameräre. wolder niht slahen tot.
er schonte finer zohte. als im sin tugent gebot.

Mit starcken sinen handen. lief er Albrichen an.
do vieng er bi dem parte. den alt grisen man.
er zogeten ungesuge. das er vil lwt ersere.
zoht des iwngen rechen. diu tet Albriche we.

Loete rief der chone. nu lazzet mich genesen.
vnt moht ich niemens eigen. an einen rechen wesen.
dem swor ich des eide. ich wäre im vndertan.
ich diende iw e' ich stirbe. so sprach der listige man.

Do bant er Albrichen. alsam den risen e'.
die Sifrides chreste. taten im vil we.
das twerch begunde vragen. wie sint ir genant.
er sprach ich bin ez Sifrit. ich wande ich wäre iw wol bekant.

So wol mich dirre märe. sprach aber das getwerch.
nu han ich wol erfonden. diu degentlichen werch.
das ir von waren schulden. muget landes herre wesen.
ich twon swaz ir gebietet. das ir lazet mich genesen.

Do sprach der herre Sifrit. ir solt balde gan.
vnt bringet mir der rechen. der besten der wir han.
twsint Nibelunge. das mich die hie gesehn.
was er der aller wolde. des hort in niemen veriehn.

Dem risen vnt Albrichen. lost er do diu bant.
do lief er harte balde. da er die rechen vant.
er wacht in grozen sorgen. vil manigen chonen man.
er sprach wol vf ir helde. ir sult zw Sifride gan.

Si sprungen von dem bette. vnt waren vil bereit.
twsint sneller degene. wuden wol gekleit.
si chomen da si fonden. Sifriden stan.
da wart ein sehone grozen. ein teil mit vorhten getan.

Vil kercen wart enzündet. man sehancht im lutter tranch
daz si so balde chomen. des saget er in do danch.
er sprach ir muoet hinnen. mit mir vber floot.
des vant er vil bereit. die helde chven vnt gvot.

Wol driezech hundert rechen. die waren schiere komen.
vz den wrden tusint. der besten do genomen.
den braht man ir helme. vnt ander ir gewant.
do er si fveren wolde. in daz Prvnhilde lant.

Hort ir goten ritter. was ich ir welle sagn.
ir solt vil richiv chleider. da zehove tragen.
da wir sehen muoen. vil minnekliw wip.
dar umbe solt ir zieren. mit goter wate den lip.

Ir sprichet liht ein tomber. ez mach wol loge wesen.
wie mohte so vil ritter. bi ein ander sin genesin.
wa namen si di spise. wa namen si gewant.
sine chonden; niht verenden. vnt ob in dienten drizzech lant.

Sivrit was so riche. als ir wol habt gehort.
im diente daz chunich riche. vnt Nibelunge hort.
des gaber sinen degenen. vil vollechlich genwoch.
wande sin wart doch niht minre. swie vil man von dem schazze trovoch.

Vil froo an einem morgen. hoben sie sih dan.
was sneller geverten. Sivrit do gewan.
si forten ros div goten. vnt herlich gewant.
si chomen ritterliche. indaz Prvnhilt lant.

Do stonden in den venstern. div minneklichen kint.
do sprach div kuniginne. weiz iemen wer die sint.
die dort her gein vns vliezent. so verre vf ienem se.
si forent segel riche. die sint noch wizzer danne ein sne.

Do sprach der vogt von Rine. ez sint mine man.
die het ich an der verte. hie nahe bi verlan.
die han ich besendet. frowe die sint chomen.
der herlichen gesten. wart vil groze war genomen.

Do sach man Sifride. vor in eime scheffe stan.
in vil herlicher wäte. im volget manic man.
do sprach die kuniginne. her chonic ir solt mir sagen.
sol ich die geste enpfahen. oder sol ich grozen si verdagen.


Ir solt in beegene. sprach er mit zyhnen gan.
ob wir si sehen gerne. daz si wol daz verstien.
do tet die kuniginne. daz ir der kunic geriet.
Sifride mit dem grooze. von den andern si do schiet.

Man schoof in herberge. mit willen al zehant.
do was so vil der geste. chomen in daz lant.
daz si sich allenthalben. drungen mit den seharn.
do wolden die vil chonen. zu den Burgonden varn.

Do hiez die kuniginne. teilen sa zehant.
golt vnt silber. roff vnt oveh gewant.
den vrenden vnt den chunden. vil manigem werden man.
des ir ir vater hete. nach sime tode vil verlan.

Si hiez oveh sagen von Rine. den rechen also her.
daz si des schazes nämen. minre oder mer.
daz si daz mit ir brehten. in Burgonden lant.
des antwert ir Hagene. in hohem mote sa zehant.

Vil edeliv kuniginne. iw si for war geseit.
ez hat der kunic von Rine. golt vnt kleit.
also vil zegebene. daz wir des habn rat.
daz wir iht hinnen foren. iwer golt oder iwer wat.



Nein durch mine liebe, sprach das magedin.
ich wil mit mir hinnen, fveren zweinzich schrin.
von golde vnt oveh siden, daz gebn sol min hant.
so wir chomen ober, indaz Guntheres lant.

Do sprach die kuniginne, wem laz ich minir lant.
di sol nu hie bestiften, vnser beider hant.
do sprach der kunic edele, nu heizet her gan.
swer in dar zuo gevalle, den soln wir vogt wesen lan.


Ein ir hohsten mage, die frowe bi ir sach,
er was ir woter bruder, zu dem die maget sprach.
nu lat in sin bevolhen, die burge vnt oveh das lant.
vnse das hie rihte, des kunich Guntheres hant.

Do welt si ir gesindes, tofint choner man.
die mit ir ze Kine, solden varn dan.
zuo ienen tofint rechen, von Nibelunge lant.
si rihten sich zer verte, man sach si riten of den sant.

Si forten mit ir dannen, sechs vnt ahzech wip.
dar zuo wol hundert magede, vil schone was ir lip.
sine sovmten sich niht langer, si ilten vaste dan.
die si da heime liezen, hej was der weinen began.

In togentlichen zühten, si rymt ir eigen lant.
si chost ir frivnt die nehsten, swaz si der bi ir vant.
mit gutem vrloube, si chomen of den se.
zuo zir vater lande, chome die frowe nimmer me.

Do hort man of der verte, maniger hande spil.
aller kurzewile, der heten si vil.
do chome in zu zir reise, ein rechter wasser wint.
si foren von dem lande, vil harte vrolichen sint.

A decorative border with intricate geometric and floral patterns, including interlocking lines and floral motifs, framing the text and central illustration.

Jane wolde si den herren. niht minnen vf der vart.
er wart ir kurzvile. vnz insin hys gespart.
ze Wormez zu der burge. zeiner hochgecit.
dar si vil freuden riche. chomen mit ir rechen sit.

